

näher/ vnd dann auch die Heyden gebraucht/ vnd den Tag von Aufgang der Sonnen biß wider zu ihrem Vnter/ vnd Nidergang/ in zwölff gleiche theil/ oder Stunden außgetheilet haben/ wie dann auß diesem Spruch Christi/ auch anderstwo im Newen Testament/ vnd dann auch auß den Heydnischen Scribenten Plinio, Palladio, Ptolomæo vnd andern Historien zu sehen/ dannenhero dann auch noch in Europa in etlichen Provinzien/ Ländern vnd Orten der Tag in 12 Stunden außgetheilet wird/ Als habe ich auch nun für das ander ein Materialisches Uhrwerck verfertigt vnd außgerichtet/ vnd etwas von den Materialischen Uhren/ Uhrwercken vnd Stunden des Tages vnd Nachts gehandelt/ vnd solches zu Lob vnd Ruhm des löblichen Sunn/ vnd Kunstreichen Handwercks der Uhrmacher/ vnd dann zu günstigem gefallen allen den jenigen Städten vnd Orten/ deren Republica vnd Stadt auch mit richtigen Uhrwercken bestellet vnd gezieret ist/ wie dann allen anderen ehrlichen Personen/ Herren vnd guten Freunden/ so ihr kurzweil mit allerley Uhrwercklein in ihren Häusern haben thun/ damit solche sampt vnd sonder/ nicht das Uhrwerck allein/ wie es alda vor ihnen hanget vnd stehet / nur eusserlich anschawen/ sondern auch bey solchem anschawen sich viel feiner Sachen vnd Lehren nützlichen zuerinnern hetten/ das von dann neben andern das achte vnd letzte Capitel dieses Uhrwercks außführlichen handeln wird.

Ob ich aber nun wol vermeynet/ ich wolt solches also in privat bey mir verbleiben lassen / in erwegung vñ betrachtung/ daß vor dieser zeit etwas stattlicheres vnd außführlicheres von solchem materialischen Uhrwerck möchte von andern Verständigern vnd Gelehrtern gehandelt vnd außgefertiget worden seyn / dennach ich aber dergleichen nicht befunden / vnd solches seinen Nutzen auch bey etlichen haben möchte/ hab ich im Namen Gottes solches hiez mit männiglichem außgefertiget in offenem Truck fürstellen wollen/ zu welcher meditation vnd Auffsetzung ich dann (wie Gott weiß) dergestalt vnd durch folgende vrsach also kommen.